



БАЛАНЫ ҚИЯНАТТАН ҚАЛАЙ ҚОРҒАЙМЫЗ?

Елімізде балаларға зорлық-зомбылық жөнінен Түркістан облысы алда тұр. Сарыағаштағы 5 жасар балдырғанның айуандықпен өлтірілуі қазақстандықтардың жанын түршіктірді. Бұл мәселенің қоғамды алаңдатқаны ақпарат құралдарындағы сол қанды оқиғаға қатысты жаңалықтардың көп қаралым жинауынан аңғарылады. Қылмысқа Президент те назар аударды. Құқық қорғау органдары тергеу амалдарын жүргізіп жатыр. Күдікті анықталды. Бірақ проблема қалды. Елде балалар ең қорғансыз жандар болып отыр.

САРЫАҒАШ ТРАГЕДИЯСЫНА НЕГЕ ЖОЛ БЕРІЛДІ?

Маусым айының соңында Ішкі істер министрлігінің кеңейтілген алқа мәжілісіне өзі қатысқан Мемлекет басшысы Қасым-Жомарт Тоқаев полиция жұртқа неғұрлым жақын болуы және халықтың қорғаны болуы шарт екенін нықтады.

Бұл дегеніміз, әрбір тәртіп сақшысы өзіне сеніп тапсырылған әр шағынаудан, көше, ауыл, ауладағы тұрғындарды өз туысындай тануы, әр отбасыдағы проблемамен таныс болуы қажет. Сондай-ақ білумен шектелмей, әрбір тентек-теліні, содыр-сойканды сырттай бақылап, қаскүнем іске баруының алдын алу үшін бәрін жасағаны жөн. Бұл – АҚШ, Германия, Нидерланд және басқа да дамыған мемлекеттер табысты

енгізіп, жүзеге асырып келе жатқан озық тәжірибе. Ал біздің елде тұрғындар төл инспекторының кім екенін білмейді. Бұған қоса, еңбекақысы төмен болғандықтан, олар жиі ауысады.

Бас прокуратураның мәліметіне сенсек, Түркістан облысының Сарыағаш ауданындағы зұлымдыққа құзырлы органдардың салғырттығы да «жол ашқанға» ұқсайды. Бүлдіршіп қызды зорлықпен өлтірді деген күдікке іліккен аудан тұрғыны Г. бұрын бірнеше рет сотталған. Соның ішінде күдікті Г.-ның 2006 жылы адам өлтіргені үшін 10 жылға бас бостандығынан айыру жазасына сотталғаны анықталды. Ендеше аса ауыр қылмысқа бейімі бар адам ретінде полицияның, пробацация органдарының жіті бақылауында болуы тиіс еді.

(Жалғасы 5-бетте)

CANCEL CULTURE КҮШКЕ АЙНАЛДЫ

Қазір қиянат жасағандар заңмен жазаланып қана құтылып кетпейді. Қоғам алдында да жауап береді. Шетелде мұны Cancel culture деп атайды. Яғни, әлеумет қиянат жасағанды қаралап, оның бүкіл қызметінен бас тартады. Осылайша, тұлғаның қасықтап жиған абыройы бір сәтте төгіледі. Бұған боксшы Бейбіт Шүменовтің оқиғасы мысал. Қоғамда үлкен резонанс тудырған жағдай әлеуметтік желіде де қарсылыққа ұшырап жатыр.



ҚОҒАМДЫҚ ЭТИКА БӘРІНЕ ОРТАК

Қазір қазақ қоғамы қарсылығын ашық көрсететін болды. Кінәліні әлеуметтік желіде жерден алып, жерге салады. Мүмкін бұл дұрыс та шығар. Осының арқасында Рамиль Мухоряпов Chosofamily косымшасын қазақшалап, «Пинта» ресторандар желісі қазақша әуендер қоса бастады. Яғни, Cancel culture үлкен күшке айналып келеді. Жокка шығару мәдениеті тек бизнес төңірегіне ғана емес, танымал азаматтарға да қатысты. Айталық, жақында әлеуметтік желіде боксшы Бейбіт Шүменовтің қоғамдық орында бала ұстаған адаммен жанжалдасқан бейнежазбасы кең таралып кетті. Білектің күшіне сенген боксшы төбелесте аянып қалмаған. Рингке арналған сокқылары қоғамдық орында барын салып көрсетіпті. Осы бейнежазбадан кейін халық Бейбіт Шүменовті ашық кінәлады. Қоғамдық этиканы сақтамағаны үшін жазасын алуы керек деп жатқандары да болды. Сәйкесінше, боксшыға қатысты Ішкі істер министрлігі қылмыстық іс те қозғапты.

(Жалғасы 4-бетте)

ЖАСТАРДЫ ЖҰМЫС МӘСЕЛЕСІ ТОЛҒАНДЫРАДЫ



3
БЕТ

АТҚАРУШЫ ХАТШЫ БОЛЫП ТАҒАЙЫНДАЛДЫ



3
БЕТ

Қайрат БАЛАБИЕВ, Мәжіліс депутаты:

ҚАРЖЫСЫНАН АЙЫРУДЫҢ ӨЗІ – ҚАТАЛ ЖАЗА

Жақында Мемлекет басшысы қол қойған «Заңсыз иемденілген активтерді мемлекетке қайтару туралы» заң қоғамда әлі де талқыланып жатыр. Азаматтық қоғам өкілдері мен заңгерлердің арасында қызу тартысқа түскен заңның мақсаты мен міндетін заң шығарушы орган өкілдері де біраз түсіндіріп берген болатын. Десе де, қоғам тарапынан сұралып отырған бірқатар сауалды Парламент Мәжілісінің депутаты, «AMANAT» партиясы фракциясының мүшесі Қайрат Балабиевке қойып көрдік.

(Жалғасы 4-бетте)



Ұлағат ХАНЗАДА, этнограф:

БҮГІНГІ ТАЗЫЛАР БҰРЫНҒЫДАЙ ЕМЕС



Қазақ ұғымында сал-сері дегенде көз алдымызға ат ерттеп, тазы ертіп, қолына қыран құсты қондырып, саятшылық құратын, өнерімен де халықты тамсантаң жанды келтіреміз. Сондай бір жанның бүгінгі бейнесі деп Ұлағат Ханзаданы атасақ жарасады. Ол – ақындық, журналистік қырларынан бөлек, ат ерттеп, тазы ерткен саятшының өзі. Ежелгі бабалар өмір салтын берік ұстанған жанмен «жеті қазының» бірі аталған асыл текті тазы тұқымы туралы кеңірек білу мақсатында сұхбат құрған едік.

– Ұлағат мырза, сізді ақындық өнеріңізден бөлек, саятшылықты серік еткеніңізді білеміз. Бүгінде қазақ өмір салтынан алыстап бара жатқан саятшылыққа қызығушылығыңыз қалай туындады?

– Менің саятшылыққа, қазақтың аңшылық танымына, тазыға деген қызығушылығым бір күнде ғана пайда бола қалған жоқ. Әкелерімізден қалған, ағаларымыздан көрген үлкен таным еді. Бала кезімізде біздің ауылда санаулы ғана адамдар тұрды. Сол санаулы елді бүкіл жұрт сыйлайтын. Себебі олар ат ұстап, тазы ертіп, саятшылықты, аңшылықты серік еткен жандар болды. Жан-жақтан ауып келетін аңдарды аулап, сол ауылды азан-қазан қылып жатушы еді. Сол кездері ауылдың жұрты тайлы-тұяғымен, тіпті ауданның атқамінерлері келіп аңшылардың үйіне жиналып, саятшылықтағы, аңшылықтағы қызықты әңгімені тыңдауға құмартып отыратын.

8»

КИНО – КРЕАТИВТІ ИНДУСТРИЯНЫҢ КӨШБАСШЫСЫ

Мемлекет басшысы Қасым-Жомарт Тоқаев Түркістанда өткен «Әділетті Қазақстан – Адал азамат» атты құрылтайдың екінші отырысында креативті индустрияны жаңа деңгейге көтеру керектігіне тоқталды. «Қазір медиа саласы, кино және сериал, мультфильм, спорт және музыка шоулары, компьютер ойындары мен кітаптар – бәрі бірігіп, біртұтас жүйеге айналды. Бұл жүйе озық құндылықтар мен қасиеттерді қалыптастыруға ықпал етеді. Біздің бұл саладағы әлеуетіміз орасан зор. Оны толыққанды жүзеге асыру үшін нақты шаралар қабылдау қажет», – деді Президент.

6»





АЙМАҚТАРДЫ АРАЛАУ ЖАЛҒАСУДА

Сенат депутаттарының аймақтарға сапары жалғасып жатыр. Халықпен кездесу барысында өңірлердегі өзекті мәселелер талқыланып, олардың шешімін табу жолдары іздестірілуде.

Парламент Сенатының депутаттары Әли Бектаев, Мұрат Қадырбек және Алишер Сатвалдиевтің сапары Қазығұрт ауданында жалғасты. Өнер мектебінде жергілікті тұрғындармен болған кездесуге ардагерлер кеңесінің мүшелері, кәсіпкерлер мен шаруалар, аудандық мәслихат депутаттары және қоғамдық ұйымдардың өкілдері қатысты. Сенаторлар кездесу барысында қабылданған ұлттық және халықаралық заңнаманың баптары мен оған толықтырулар туралы жиналғандарға жан-жақты түсіндіріп, өңірдегі мәселелер бойынша пікір алмасты.

Ал сенаторлар Нұрлан Бекназаров пен Айгүл Қапбарова Шымкент қалалық мәслихат депутаттарымен және қоғамдық кеңес мүшелерімен кездесті. Қалалық мәслихат депутаттары мен қоғамдық белсенділер кездесу барысында әлеуметтік төлемдердің мөлшері мен тәртібіне, қала аумағындағы инфрақұрылымды дамытуға, газ жеткізуге, жаңа жұмыс орындарын ашуға, ішкі нарықты қорғауға, кәріз жүйелерін тазартуға қаржы бөлуге және т.б. маңызды мәселелерге қатысты сұрақтар қойды. Депутаттар кездесулерде көтерілген мәселелерді бақылауда ұстайтынын және Үкіметпен бірлесіп оларды шешу жолдарын әзірлейтінін атап өтті.

Сенат депутаты Руслан Рүстемов Қызылорда облысындағы Жалағаш ауданында болды. Жергілікті тұрғындар өз кезегінде Жалағаш, Қармақшы, Қазалы аудандарындағы Аққыр, Шобанқазған, Кәукей ауылдарына шекара маңы аймағының

мәртебесін бекіту, Жүргенов ауылында мәдениет үйін салу және «Дипломмен – ауылға» бағдарламасын жетілдіру мәселесін көтерді.

Парламент Сенатының депутаты Бекболат Орынбеков Жамбыл ауданында болып, Тастөбе ауылындағы «Қызылдіхан» өндірістік кооперативінің жұмысымен танысты. Сапар барысында сенаторға даладағы жұмыс барысы көрсетілді. Аудан әкімінің айтуынша, кооператив қарамағындағы жердің жалпы ауданы 1 875 гектарды құрайды. Кооператив басшылары 1 745 гектар ауыл шаруашылығы алқабын пайдаланады. Бүгінде Тастөбе ауылының елу тұрғыны кәсіпорында жұмыс істейді.

Сенат депутаты Бекбол Орынбасаров Маңғыстау облысындағы жұмысы аясында әлеуметтік нысандарды аралап, еңбек ұжымдарымен әңгімелесті. Кездесу барысында депутат экономика салаларындағы қолдау шараларына түсініктеме беріп, өңдеу өнеркәсібін одан әрі дамытуға бағытталған негізгі тетіктерге тоқталды.

Сенатор Айнұр Арғынбекова Семей қаласындағы «Жылукомунэнерго» МКК-де болып, 2023–2024 жылдарға арналған жылыту маусымына дайындық жоспарымен танысты. Оған қаладағы қазіргі кездегі жылу көздері туралы жан-жақты ақпарат берілді.

Сенат депутаты Закиржан Кузиев Алматы облысына сапарында Қонаев қаласын дамыту жоспарымен және G4 СІТУ арнайы экономикалық аймағының жобасымен танысты. Сенаторға Алматы мен Қонаев қалаларының арасындағы, Алматы-Өскемен республикалық автомагистралінің бойында орналасқан G4 қазіргі заманғы құрылымдағы кіріккен төрт ақылды қала екені айтылды. Бұл экономикалық аймақ қаржы, бизнес, мәдени және сәулет орталығына айналады.

СЕГІЗ ЖЫЛҒА СОТТАЛДЫ



Ақтөбе облысы Алға аудандық сотында Қарабұлақ ауылының әкімі Ернар Махамбетовтің өліміне қатысты іс қаралып, үкім шықты. Сотталушы Құрман Өтегенов 8 жылға бас бостандығынан айырылды.

Іс материалына сүйенсек, жәбірленуші мен сотталушы шаруа қожалығына барып, сол жерде ішімдік ішкен. Кейін арада жанжал шығып, бірі екіншісіне пышақ сұғып алған. Сот медициналық сараптама қорытындысына сүйенсек, жәбірленуші Ернар Махамбетов кесіп-тесетін заттан жарала-

нып, көп қан жоғалтқаны белгілі болды. Ауруханаға жеткізген кезде оның өлімі тіркелді.

«Сотталушы Құрман Өтегенов Қылмыстық кодекстің «Денсаулыққа қасақана ауыр зиян келтіру» бабы бойынша айыпты деп танылып, 8 жылға бас бостандығынан айыру жазасын тағайындалсын. Жазасын өтеу орны қылмыстық атқару жүйесінің қауіпсіздігі орташа мекемесі болып белгіленсін», – деді Алға аудандық сотының судьясы Камшат Килбаева.

Еске салсақ, оқиға былтыр желтоқсан айында болған еді.

ҚЫРЫҚ МИЛЛИОНДЫ ҚЫМҚЫРҒАН

Павлодарда өзін банк қызметкері ретінде таныстырып, тұрғындарды 40 млн теңгеге сан соқтырған алаяқ ұсталды. Бұл туралы ІІМ Криминалдық полиция департаменті Киберқылмысқа қарсы күрес орталығының бастығы Жандос Сүйінбай деп мәлім етті.

«Биыл Астана қаласы Полиция департаментінің базасында бір терезе қағидаты бойынша жұмыс істейтін CyberPol пилоттық жобасы құрылды. Киберқылмыстарды тиімді тергеу және ашу үшін тергеу, жедел және криминалистикалық бөлімшелердің қызметкерлері бір жерде шоғырланып, банк секторымен және уялы байланыс операторларымен жедел өзара іс-қимылды жүзеге асырады», – деп түсіндірді Жандос Сүйінбай.

Оның сөзінше, Павлодар облыстық полиция департаментінің CyberPol тобы банк қызмет-

керлерінің атынан алаяқтық жасаған қала тұрғынын ұстаған.

«Қазір күдіктінің 20 қылмысқа қатысы бар екені анықталды. Келтірілген залал сомасы шамамен 40 млн теңгені құрады. Оған ешқайда кетпеу туралы бұлтартпау шарасы қолданылды», – деп мәлім етті Жандос Сүйінбай.

Айта кетейік, биыл алғашқы жартыжылдықта елімізде 9,4 мың интернет-алақтық қылмысы тіркелді.

ЖИЫРМА МИЛЛИОНҒА ЖАҚЫНДАДЫҚ



Биылғы 1 маусымдағы дерекке сәйкес, еліміздегі халық саны – 19 млн 879 мың адам.

Ұлттық статистика бюросының дерегіне, жалпы халықтың 61,9 пайызы немесе 12 297 100 адам – қалада, ал 38,14 пайызы немесе 7 581 900 адам ауылда тұрады.

2023 жылғы қаңтар-мамырда Қазақстанға келгендер саны 2022 жылғы қаңтар-мамырмен салыстырғанда 91,8 пайызға артып, кеткендер саны 45 пайызға азайды.

Еліміздегі негізгі көші-кон алмасуы ТМД мемлекеттерімен өтуде. ТМД елдерінен келгендердің және сол елдерге кеткендердің үлесі – 89,5 және тиісінше 72,1 пайызды құрады.

Ел ішінде қоныс аударатын көшіп-қоныштар саны 2,6 пайызға азайды. Өңіраралық қоныс аудару бойынша халық көші-қонының он айырымы еліміздің 3 өңірінде – Алматы (12 145 адам), Астана (11 424 адам) және Шымкент (571 адам) қалаларында байқалды.

КІРЖУҒЫШ МАШИНАҒА КЕПТЕЛІП ҚАЛҒАН

Оралда екі жасар қыз кіржуғыш машинаның барабанына қыстырылып қалды.

Облыстық Төтенше жағдайлар департаментінің баспасөз қызметі мәлім еткеніндей, оқиға 17 шілде күні түстен кейін М.Жүнісов көшесіндегі 184-үйде болды.

«Сағат 14.20-да 112 пультіне қыз баланың жартылай автоматты кіржуғыш машинаның барабанына қыстырылып қалғаны жөнінде хабар түскен. Оқиға орнына жедел жеткен құтқарушылар 2021 жылғы қызды арнайы құралдардың көмегімен машина барабанынан шығарып, ата-анасына табыстады. Сәбиге алғашқы медициналық көмек көрсетілді. Жұмыс сағат 15.00-де аяқталды. Департамент мамандары ата-аналарға кішкентай балаларын қараусыз қалдырмау керектігін еске салады» деп хабарлады ведомстводан.



ЖОЙҚЫН ЖОЛ АПАТЫ БОЛДЫ

Түркістан облысында жантүршігерлік жол апаты болып, 9 адам қаза тапты.

Бәйдібек аудандық полиция бөліміне 17 шілдеде сағат 09:00 шамасында Шаян ауылы маңында жол апаты болғандығы туралы хабарлама келіп түскен.

«Облыстық маңызы бар Екпінді-Созақ тасжолы бойында Nissan, Toyota Camry және

Volkswagen Gafter автокөліктері соқтығысқаны анықталды. Апат салдарынан көлік құралдары өртенген. Нәтижесінде, 9 адам қаза болып, 13 адам ауруханаға жеткізілді. Екі адам медициналық көмектен бас тартты», – деді Түркістан облысы ПД бастығының бірінші орынбасары Бағланбек Айтпаев.

Алдын ала мәліметтер бойынша, Nissan автокөлігі қарсы бағытқа шығып кеткен.

ҚАЗАҚСТАНДЫҚТАР ҚАНДАЙ КӨЛІККЕ ҚҰМАР?

Биыл қазақстандықтар 66 мыңнан астам жаңа автомобиль сатып алды. Бұл туралы Индустрия және инфрақұрылымдық даму министрлігі мәлім етті.

«Қазақстан Автобизнес қауымдастығының деректеріне сәйкес, екінші ай қатарынан айлық сатылымда рекордтық көрсеткіш тіркеліп отыр. Мамырда отандық дилерлер 14688 жеңіл автомобиль

мен коммерциялық техника сатты. Бұл былтырғы мамырдағы көрсеткіштен 77,2 пайызға көп» делінген министрліктің хабарламасында.

2023 жылдың 5 айында ел тұрғындары 66 331 жаңа жеңіл автомобиль, жүк көлігі мен автобус сатып алды. Бұл өткен жылдың көрсеткішінен 65,8 пайызға жоғары. Ең көп сатылған брендтер – Hyundai, Chevrolet және Kia.



